

Franza di l'aiuto vol dar la Signoria al re Cristianissimo, venendo a la impresa de Milan, *videlicet* che, atento in le letere di Roma si ha, il Papa voler far trieve zeneral, et fati li monitorii a li principi christiani et li manda, et che 'l cardinal Aus ha dito a Soa Santità il Re come Christianissimo sarà contento obedirli per atender a tanta bona opera contra il Turco, per il chè, facendo al presente alcuna motion di guera, saria contrario a questo; ma che Soa Maestà è certa semo obsequentissimi di quella; con altre parole.

Et sier Gabriel Moro predito contradise, dicendo voria indusiar do zorni et in questo mezo intender li partidi vol far questo orator cesareo, e poi tratar questo.

Et li rispose sier Piero Boldù savio a terra ferma. Poi parlò sier Santo Trun, vuol se tegnimo con Franza, et fe' lezer una soa letera vol scriver in Franza et saper il tempo quando vol Soa Maestà venir a la impresa, e in ultima dir quello vol i Savii. Poi parlò sier Marin Morexini, fo avogador, e fe' bona renga; ma vol unirsi streto con Franza, et laudò quasi la parte del Trun, biasemò molto quello del Moro. Poi parlò sier Domenego Trevixan el cavalier, procurator, savio dil Consejo, con gran autorità, dicendo saria contrario a quello vol far il Papa, come se rispondesse altramente etc. Andò le parte: 9 dil Moro, 24 dil Trun, 147 di Savii. Et fu presa.

Fu posto, per li Savii preditti, atento il collegio di medici, phisici si ha dolestò li XX Savii voler tansarli, cosa che mai più è sta tansati, et hanno li privilegi di non pagar decime; atento tieneno medico col Capitano zeneral et in campo, pertanto sia comesso a li XX Savii in Rialto sopra le appellation li aldino et a bossoli et balote terminino se dieno esser tansati.

Andò in renga sier Francesco Morexini, fo savio a terra ferma, dicendo dieno esser tansadi per la industria etc. Et li rispose sier Marco Antonio Venier dottor, savio a terra ferma; poi parlò sier Marco da Molin fo a le Cazude qu. sier Francesco, qual vien in Pregadi uno anno poi compido l'officio, dicendo dieno esser tansadi, avadagnano benissimo. Et venuto zoso, fo rimesso mandar la parte; ma questo Consejo un zornò di stà settimana sarà chiamato, et li aldirano con loro avochati.

65\* Fu posto, per tutto il Colegio, che atento sier Anzolo Malipiero di sier Sebastiano, va castelan e camerlengo di Antivari, habbi a conto dil suo salario ducati 100, et non si potendo pagar, che li ditti

ducati 100 si pagino a la camera di Ruigo. Et non fu preso. 117, 54, 6. La pende.

Fu posto, prima, avanti li Savii andasseno in Pregadi, per li Consieri, havendosi a far Consolo in Alexandria, che per questa volta si fazi per scurtinio et quatro man di election, con li modi fo electo il presente Consolo è li. E questa parte non se intendi presa se non sarà presa et posta nel nostro Mazar Consejo. Le qual condition è questa, che li saraffi 200 li dà il cotimo et saraffi 200 ha di la doana de li, siano liberi soi, et poi acetado non possi refudar. Ave: 139 di si, 11 di no.

*1523 a dì 27 April. In Pregadi.*

66

*Questo è il summario di capitoli rechiesti per li oratori di la comunità di Sebinico, zòè Zuan Tavalich et Francesco di Grichsan citadini di Sebinico, et la risposta de' Savii.*

Primo. Che si provedi a la segurtà de la cità et pagamento di provisionati. A questo si risponde si farà ogni oportuna et expediente provisione.

Secundo. Si metti cavalli 100 di più, *videlicet* sotto Piero Chelmi 50 et soto l'altro capo 50, et che una parte di ditti cavalli habitino nel castello di Velin et l'altra nel castello Veralipagho per custodia dil territorio, et che si provedi di loro pagamenti. Se risponde, è stà dato in commission al Provedador zeneral va in Dalmatia, mandi a ditta custodia uno altro capo di stratioti di quelli è a Zara con cavalli 50, et che debbino ponerli a le do guardie predite.

Tertio. Si mandi ducati 150 a quel rector di Sebinico per far compir il castello di Velin, per poter aver le intrade. Se risponde si manda ducati 100 per hora per compir la ditta fabrica, et achadendo si manderà il resto.

Quarto. Che do galle stagino ferme li in porto di Sebinico, per segurtà dil porto et di quella cità. A questo se risponde, è stà comesso al Capitano del Golfo stagi continue de li do galle, et al presente si manderà le do galle, che hora si armano de qui.

Quinto. Che si deputi uno castelan a castel Velin con 12 compagni. Si risponde se cometerà al Provedador zeneral che ogni do mexi mandi a dita custodia el caporal di castello di Sibinico con otto over dieci fanti, et cussi si observi ogni do mexi.

Sexto. Che si mandi 2000 tavole per far caxe per l'habitation di soldati, che stanno in le caxe di cittadini. Se risponde semo contenti di mandarle.